



Sud Bosne i Hercegovine
Sud Bosne i Hercegovine

Broj: S1 3 IŽ 037859 20 IŽ
Sarajevo, 29.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Mirsade Džindo, predsjednika vijeća, Srete Crnjaka i Vesne Trifunović, članova vijeća, odlučujući o žalbi Nade Đurić, Ada Ciganlija 4, Desna obala Savskog jezera, Restoran Makondo 123 (kod Savčić Duška), 11030 Beograd – Čukarica, R Srbija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 29.10.2020. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što bi dostavom osjetljivog izbornog materijala (glasačkih listića) na adresu Restoran Makondo 123, Ada Ciganlija 4, Desna obala Savskog jezera, bilo povrijeđeno osnovno izborna načelo tajnosti glasanja i izbora direktno od birača, garantovano članom 1.3. Izbornog zakona BiH.

Žaliteljica je protiv navedene odluke blagovremeno izjavila žalbu u kojoj navode da je njena prijava odbijena iz razloga prijave na više adresa. Ističe da materijal za glasanje treba da bude upućen na adresu Ada Ciganlija 4, Desna obala Savskog jezera, Restoran Makondo 123 (kod Savčić Duška), 11030 Beograd – Čukarica, R Srbija.

Centralna izborna komisija Bosne i Hercegovine u odgovoru na žalbu navodi da adresa za dostavu glasačkog materijala za Nadu Đurić označena u Prijavi za glasanje izvan BiH PRP-1, ukazuje na mogućnost povrijeđeno osnovno izborna načelo tajnosti glasanja i izbora direktno od birača, garantovano članom 1.3. Izbornog zakona BiH.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke utvrdila da je žaliteljica označena adresa za prijem glasačkog materijala Ada Ciganlija 4, Desna obala Savskog jezera, Restoran Makondo 123 (kod Savčić Duška), 11030 Beograd – Čukarica, R Srbija.

S tim u vezi, Centralna izborna komisija BiH je, na osnovu potpuno i pravilno utvrđenog činjeničnog stanja, izvela i pravilan zaključak, da bi se dostavom osjetljivog izbornog materijala na adresi koja upućuje na restoran, povrijedilo osnovno izborno načelo tajnosti glasanja i izbora direktno od strane birača, a koje garantuje odredba člana 1.3 Izbornog zakona BiH, te da izborna manipulacija može za posljedicu imati planirani izborni rezultat.

Napomene radi, žaliteljici nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer imenovana može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

Predsjednik Vijeća
Sudija

Mirsada Džindo